

অপ্রতিরোধ্য গতিতে এগুচ্ছে আবাহনী-মোহামেডান

স্পোর্টস রিপোর্টার

আবাহনীর লক্ষ্য টানা ৪র্থ বারের মতো শিরোপা, মোহামেডানের লক্ষ্য ৮ বছর পর শিরোপা পুনরুদ্ধার। দুই চিরপ্রতিদ্বন্দ্বীর এই লক্ষ্য পূরণের লড়াইয়ে জমে উঠেছে প্রিমিয়ার ডিভিশন ক্রিকেট লীগ। অষ্টম রাউন্ডেও তাদের গায়ে আঁচড় কাটতে পারেনি কেউ। গতকাল মিরপুর স্টেডিয়ামে অনুষ্ঠিত বিগ ম্যাচে আবাহনী ৬ উইকেটে হারিয়ে দিয়েছে গাজী ট্যাংককে, ফতুল্লা স্টেডিয়ামে আর এক শত্রু প্রতিদ্বন্দ্বী কলাবাগানকে ৫ উইকেটে হারিয়ে দিয়েছে মোহামেডান।

মিরপুর স্টেডিয়ামে অনুষ্ঠিত ম্যাচে গতকাল টসে হেরে ব্যাট করতে নেমে গাজী ট্যাংকের ২৪০/৮ স্কোরের জবাব দিতে দুরূহ পরিস্থিতিতে পড়েনি আবাহনী। ওপেনিং জুটির ১৩৪ রানের পার্টনারশিপ মূলত ম্যাচ থেকে ছিটকে ফেলেছে গাজী ট্যাংককে। ব্রেক থ্রু দেয়া অফ স্পিনার নাইম এই দুই ওপনারকে ফিরিয়ে দিয়েছেন, উড়িম্যার পারিদাও তার শিকার। তবে পর পর তিন ব্যাটসম্যানকে নাইমের (৩/৪২) ফিরিয়ে দেয়ার পরও পা পিছলে পড়েনি আবাহনী টার্গেট সহজ হওয়ায়। ৭৬ বলে ৫৬ রান শেষে ইমরুল কায়স ফিরে এসেছেন নাইমের বলে বোল্ড হয়ে, তবে চলমান লীগে তৃতীয় সেঞ্চুরি ছিল রনি তালুকদারের প্রাপ্য। ৮৪ বলে ৯ চার, ২ ছক্কায় জাত চেনানো এই ব্যাটসম্যান নাইমের বলে এলবিডারু হয়েছেন ৯০ রানের মাথায়। আঙ্গুলের ইনজুরি কাটিয়ে সাকিব আল হাসান ম্যাচে ফিরেছেন সাকিবীয় রূপে (২/৩৮ও ৩২ অপ.), ব্যাটিং অর্ডারে প্রমোশন পেয়ে আস্তার প্রতিদান দিয়েছেন নাদিফ চৌধুরী (৪০)।

গাজী ট্যাংকের ইনিংসের শুরুটা ছিল না প্রত্যাশিত, স্কোরশিটে ৬৯ উঠতে ৪ ব্যাটসম্যানকে দিশেহারা দলকে টেনে তোলেন মিসবাহ উল হক (৪৩), কাপালী (৬৬)। আবাহনীর অভিজ্ঞ বাঁ-হাতি স্পিনার রফিক গাজী ট্যাংকের রানের চাকা শ্লথ করে দিয়েছেন (১০-২-৩৩-৩)। এই ম্যাচ হেরে কঠিন হয়ে গেল গাজী ট্যাংকের সুপার লীগে ওঠা (৮ ম্যাচে ৭ পয়েন্ট)।

ফতুল্লায় বিগ ম্যাচে মোহামেডানকে হাসিয়েছেন স্পিনার নাবিল সামাদ (৩/৪১), সাকলায়েন সজীব (২/৩৮)। তার পরও লোয়ার অর্ডার আরিফুলের ব্যাটিংয়ে (৭৬ অপ.) ২২৫/৭ পর্যন্ত ইনিংস টেনে নিয়ে গেছে কলাবাগান। প্রথম রাউন্ডে হারের পর টানা ৬ ম্যাচ জিতে জায়ান্টদের ঝাঁকুনি দেয়া কলাবাগানের চ্যালেঞ্জের জবাব সহজেই দিয়েছে মোহামেডান। ২১ বল হাতে রেখে ৫ উইকেটে জিতেছে তারা টপ অর্ডার আফতাব (৮৪ বলে ৬৪) এবং রিয়াদের (১০২ বলে ৬৪) ব্যাটিংয়ে। মোহামেডানের ৮ম জয়ের বিপরীতে কলাবাগানের এটি দ্বিতীয় হার।

বিকেএসপিতে অনুষ্ঠিত দিনের অন্য ম্যাচে বিমানের কাছে ১০ রানে হেরে গেছে গতবারের রানার্স আপ সূর্যতরুণ। প্রথমে ব্যাট করে ১৬৬ রানে অল আউট হওয়া বিমানকে স্বস্তির জয় উপহারে অবদান রেখেছেন পেস বোলার শফিউল (৪/২৮)। জয়ের জন্য শেষ ২৫ বলে সূর্যতরুণের প্রয়োজন ছিল ২১ রান, এতোটা সুবিধাজনক অবস্থায় থেকেও সূর্যতরুণ শেষ ৬ ব্যাটসম্যান হারিয়েছে মাত্র ১১ রানে! বিমানের এটি ৮ম ম্যাচে ৬ষ্ঠ জয়, অন্যদিকে সূর্যতরুণের ৫ম হার।

সংক্ষিপ্ত স্কোর

আবাহনী-গাজী ট্যাংক

গাজী ট্যাংক : ২৪০/৮ (৫০ ওভারে), নাজিমুদ্দিন ১৯, মিঠুন ১৩, শাহরিয়ার নাফিস ২৮, মিসবাহউল হক ৪৩, অলক কাপালী ৬৬, নাইম ১৮, রাজ ১৯, ফরহাদ রেজা ১৬ (অপ.), রফিক ৩/৩৩, সাকিব ২/৩৮, শুভাশীষ ১/৩৮, আরাফাত সানি ১/৪১

আবাহনী : ২৪১/৪ (৪৬.০ ওভারে), ইমরুল কায়েস ৫৬, রনি তালুকদার ৯০, নাদিফ ৪০, পারিদা ৭, সাকিব ৩২ (অপ.), নাইম ৩/৪২, রাজ ১/৪১

ফল : আবাহনী ৬ উইকেটে জয়ী।

মোহামেডান-কলাবাগান

কলাবাগান : ২২৫/৭ (৫০ ওভারে), নাজমুস সাদত ৩১, শিশির ২০, জাভেদ ওমর ৩, রাকিবুল ১২, জাহিদ ১৯, জোবায়ের ২৪, আরিফুল ৭৬ (অপ.), শাহাদত রাজীব ১৬ (অপ.), সাকলায়েন ২/৩৮, নাবিল সামাদ ৩/৪১, রিয়াদ ১/২৯, মাহরুফ ১/৬০

মোহামেডান : ২২৭/৫ (৪৬.৩ ওভারে), সামছুর শুভ ৩১, আশরাফুল ৩২, আফতাব ৬৪, মার্শাল আইয়ুব ১৩, রিয়াদ ৬৪ (অপ.), পারভেজ মাহরুফ ১০ (অপ.), ফরিদউদ্দিন ৩/৪১, নাজমুস সাদত ১/২৫, শাহাদত রাজীব ১/৬৫

ফল : মোহামেডান ৫ উইকেটে জয়ী।

সূর্যতরুণ-বিমান

বিমান : ১৬৬/১০ (৪৮.৫ ওভারে), অভিষেক ১৫, ইলিয়াস সানি ৩০, অমি ১৩, জিহান মোবারক ৯, ইমরান ৬, শরীফুল্লাহ ২৩, শফিউল ১৮ (অপ.), তাপস ২/২৯, জাকারিয়া ২/৩১, রাজিন ১/২১, তান্না ১/১২

সূর্যতরুণ : ১৫৬/১০ (৪৯.৪ ওভারে), জুনায়েদ ২৯, মাশুকুর ২৪, রাজিন ৩৫, হাবিবুল বাশার ৩১, শফিউল ৪/২৮, মোশাররফ রুবেল ২/২৩, সানোয়ার ১/১৫, শরীফুল্লাহ ১/২৮, ইলিয়াস সানি ১/৩১, তারেক ১/২৯

ফল : বিমান ১০ রানে জয়ী।

নিষ্প্রাণ ড্রয়ে প্রাপ্তি কয়েকটি সেঞ্চুরি

স্পোর্টস রিপোর্টার

পঞ্চম দিনের পড়ন্ত বিকেলেও উইকেট প্রথম সেশনের মতোই চকচকে। যেন নতুন তৈরি রাস্তা। কোন ফাটল কিংবা ভাঙনের লেশমাত্র নেই। আহমেদাবাদের সর্দার প্যাটেল স্টেডিয়ামের এই উইকেটে কি জয় পাওয়া যায়? মোটেও না। পাঁচদিনে মাত্র ২১টি উইকেট পড়লে তো কারো জেতার প্রশ্ন তোলাটাই অবাস্তব। ঠিক তাই। মাতেরায় সিরিজের প্রথম ম্যাচে কেউ জিততে পারেনি। একেবারে নিষ্প্রাণ ড্রয়ে শেষ হয় ভারত-শ্রীলঙ্কার প্রথম পাঁচ দিনের ম্যাচটি। ৭৬০ রান করে প্রায় সাড়ে তিনশ' লিড নিয়ে লংকা যে ইতিহাসের স্বপ্ন দেখছিল তা হয়নি প্যাটেল স্টেডিয়ামের ব্যাটিং প্যারাডাইসে গম্ভীর ও শচীনের সেঞ্চুরিতে। দ্রাবিড়, ধোনি, দিলশান, প্রসন্না জয়াবর্ধনে, মাহেলা জয়াবর্ধনে ও গম্ভীরের পর সেঞ্চুরির মিছিলে যোগ দিয়েছে মাইলস্টোন ম্যান শচীন টেডুলকারও। মোতেরার ম্যাচেও প্রাপ্তি যেন এই সেঞ্চুরিগুলোই। সাথে শচীনের আরেকটি রেকর্ড- প্রথম খেলোয়াড় হিসেবে আন্তর্জাতিক ক্রিকেটে ৩০ হাজার রানের মাইলস্টোন স্পর্শ করা। ভিলেগেদারার ইয়র্কার ধরনের বল ব্যাট দিয়ে ঠেকিয়ে ট্রিকি সিঙ্গেলসের সাথে ক্যারিয়ারের ৪৩তম এবং লংকার বিপক্ষে অষ্টম তিন অংকের ম্যাজিক ফিগারের স্পর্শ পেয়ে যান শচীন। ম্যাচ বাঁচানো এই ইনিংসের পথে ৩৫ রানের সময় তিনি ত্রিশ হাজার রানের রেকর্ডটিও পেয়ে যান। ১০০ পূরণের সাথে সাথেই দু' দুল ম্যাচ ড্র হিসেবে মেনে নেয়। ভারতের তখন রান ছিল ৪ উইকেটে ৪১২। শচীনের পার্টনার লক্ষণ তখন ব্যাট করছিলেন ৫১ রানে। অবিচ্ছিন্ন পঞ্চম উইকেটে এ দু'জন ১৩৭ রান তুলে লংকার জয়ের সব সম্ভাবনার মৃত্যু ঘটান। গম্ভীর

কারিয়ারের সপ্তম (১১৪ রান) টেস্ট শতক হাঁকিয়ে ভারতের প্রতিরোধের প্রথম ধাপটি পেরিয়ে দেন। তার বিদায়ের পর দায়িত্ব নিজেদের কাঁধে তুলে নেন শচীন-লক্ষণ। তারা সে কাজটি সুচারুরূপেই পালন করছেন প্রায় দু'সেশন (৪৯ ওভার) ব্যাট করে। এতে সহায়কের ভূমিকায় ছিল মাতেরার ব্যাটিং উইকেট। যেখানে একুশটি উইকেটের বিনিময়ে ১৫৯৮ রান আসে। যুবরাজ, ধোনিকে দ্বিতীয় ইনিংসে তাই মাঠেই নামতে হয়নি ব্যাট করতে। ২৭৫ রানের অনবদ্য ইনিংসে ম্যাচ সেরার পুরস্কার জিতেন শ্রীলংকার মাহেলা জয়াবর্ধনে।

ভারত : ৪২৬ ও ৪১২/৪ ১২৯ ওভার : গম্ভীর ১১৪, শেবাগ ৫১, দ্রাবিড় ৩৮, মিশ্র ২৪, শচীন ১০০ (অপরাজিত), লক্ষণ ৫১ (অপরাজিত) ভিলেগেদারা ১/৭০, হেরাথ ২/৯৬, ম্যাথিউস ১/২৯

শ্রীলংকা : ১ম ইনিংস ৭৬০/ ৭ (ডিক্লেয়ার্ড)

ফল : ম্যাচ ড্র

ম্যান অব দ্য ম্যাচ : মাহেলা জয়াবর্ধনে

বাজির দরে এগিয়ে ব্রাজিল

ইন্টারনেট

ফুটবল রোমান্টিকদের কল্পনায় অনেক নাম। কেউ শিরোপা দেখছেন শৈল্পিক ফুটবলের পসরা সাজানো স্পেনের হাতে। আবার আফ্রিকার মাটিতে প্রথমবারের মত অনুষ্ঠেয় আসরে ওখানকার কোন দেশকেও চ্যাম্পিয়ন হিসেবে দেখছেন কেউ কেউ। তবে শেষে ঐ একই প্রশ্ন, এবারই কি ষষ্ঠ বিশ্বকাপ জিতবে ব্রাজিল? বিশ্বকাপে ব্রাজিলের সাফল্যের গল্প নতুন করে শিষ্যদের কানে ঢুকিয়ে দেয়ার দরকার নেই কোচ দুঙ্গার। বিশ্বের জনপ্রিয় খেলাটির সবচেয়ে বড় ইভেন্টের সফলতম দল ব্রাজিল। আগামী বছর দক্ষিণ আফ্রিকাতেও নিশ্চিতভাবে ফেভারিট তারা।

প্লে অফের মাধ্যমে শেষ ছয় দলের উত্তোরণের মধ্য দিয়েই চূড়ান্ত হয়েছে বিশ্বকাপের ৩২টি দেশ। গত বুধবার ফ্রান্স ও উরুগুয়ের উত্তোরণ নিশ্চিত করেছে, আসছে বিশ্বকাপে আগের সাত চ্যাম্পিয়ন দলই অংশ নিচ্ছে। বেশ ক'টি দল ঘিরেই প্রত্যাশার পারদ উর্ধ্বমুখী। ১৯৬৬ সালের পর প্রথমবারের মত বিশ্বকাপ জিততে মরিয়্যা ফ্যাবিও ক্যাপেলোর ইংল্যান্ড। ডিয়েগো ম্যারাডোনার জাদুতে দু'বারের চ্যাম্পিয়ন আর্জেন্টিনার সম্ভাবনাও উঁকি দিচ্ছে। মূলমঞ্চে চূড়ান্তভাবে হাসতে চায় নেদারল্যান্ড। তবে সবকিছু ছাপিয়ে পাঁচবারের চ্যাম্পিয়ন ব্রাজিল ও ইউরোপ সেরা স্পেনের মধ্যে জিভে পানি এনে দেয়া এক ফাইনালের স্বপ্নও দেখছেন অনেকে। ব্রিটেনের খ্যাতনামা বাজিকর উইলিয়াম হিলের চোখে এই স্বপ্নটাই উঁকি দিচ্ছে বেশি। শেষ হাসি কে হাসবে এখন কেবল সেটির অপেক্ষা।

ফুটবলে বছর ফেভারিটদের পতন দেখেছে বিশ্বকাপ। ১৯৬৬-তে তারকাখচিত ইতালির বিপক্ষে উত্তর কোরিয়ার জয় ফুটবল ইতিহাসে এখনো অমলিন। ১৯৯০-তে ডিফেন্ডিং চ্যাম্পিয়ন আর্জেন্টিনাকে হারায় ক্যামেরুন। ১৯৯৮'র চ্যাম্পিয়ন ফ্রান্স পরের আসরে একই পরিণতির শিকার হয় সেনেগালের বিপক্ষে। গত তিন দশকে স্বাগতিক হিসেবে বিশ্বকাপ জিতেছে কেবল ফ্রান্স (১৯৯৮)। তাই দক্ষিণ আফ্রিকাকে নিয়ে এবার আশার সঙ্গে মিশে আছে শঙ্কাও। ডার্কহর্স আইভরিকোস্টের রয়েছে দিদিয়ের দ্রগবা ও কোলো তুরের মত তারকা। এরপরও ফর্ম বিচারে ব্রাজিল-স্পেন ফাইনালের সম্ভাবনাই বেশি বাজিকরদের কাছে।

দুঙ্গার কৌশল নিয়ে অনেক সমালোচনা হয়েছে। ইদানীং ব্রাজিলের খেলায় সাম্বার ছন্দ পাওয়া যায় না বলেও রয়েছে অভিযোগ। তবে দুঙ্গার হাতে রয়েছে কাকা, ফ্যাবিয়ানো, রবিনহোর মত সুপারস্টার। এদিকে তারকার ভিড়ে স্পেনের একাদশ সাজানোটাই মধুর এক সমস্যা। জাভি হার্নান্দেজ, সেন্স ফাব্রিগাস, আন্দ্রেস ইনিয়েস্তা, ফার্নান্দো টোরেস, ডেভিড ভিয়া-নামগুলো দেখলেই তো প্রতিপক্ষের আঁতকে ওঠার কথা। তিনবারের চ্যাম্পিয়ন জার্মানি ১৯৯০'র পর আর শিরোপা জিততে পারেনি। দু'বারের রানার্সআপ নেদারল্যান্ডের ভরসা রবিন ভ্যান পার্সি ও আরিয়েন রোবেন। বাছাইপর্ব পেরোতে নাকের পানি চোখের পানি এক হয়ে গেলেও

ম্যারাডোনার দলে রয়েছেন লিওনেল মেসি, সার্জিও আগুয়েরো ও কার্লোস ট্যাভেজের মত ভয়ঙ্কর ফরোয়ার্ড। ক্যানাভারো, জামব্রোতা, বুফন, পিরলোকে নিয়ে ইতালি কি পারবে শিরোপা ধরে রাখতে? ১৯৬২-তে ব্রাজিলই কেবল এ কীর্তি গড়েছে। অঁরির বিতর্কিত গোলে ফ্রান্স চূড়ান্তপর্বে উঠলেও কোচ ডমেনেখের চোখে শিরোপা। আবার ক্রিস্টিয়ানো রোনাল্ডো, ডেকো, কারভালহোর মত তারকাদের সেরাটা বের করে আনতে সক্ষম কার্লোস কুইরোজ।

সাঁতারে যোগ হলো বাদ পড়া ইভেন্ট

স্পোর্টস রিপোর্টার

আগামীবছর ২৯ জানুয়ারী থেকে ৯ ফেব্রুয়ারী বাংলাদেশে বসছে দক্ষিণ এশিয়ার সর্ববৃহৎ ক্রীড়াযুক্ত এসএ গেমস। গেমস আয়োজনের প্রস্তুতি চলছে জোরেশোরেই। সেই সাথে আসরের বিভিন্ন ডিসিপ্লিনের বিভিন্ন ইভেন্ট নিয়েও কিন্তু পরীক্ষা-নিরীক্ষা কম হচ্ছে না। গত ১৮ নভেম্বর সাউথ এশিয়া অলিম্পিক কাউন্সিলের (এসএওসি) ৪০তম কার্যনির্বাহী সভার গেমসে যোগ করা হয়েছিল ১৬টি নতুন ইভেন্ট। দুই দিন না যেতেই গেমসের আয়োজকরা বাড়িয়ে নিলো সাঁতার ডিসিপ্লিনে নতুন একটি ইভেন্ট। সাঁতারে যোগ হওয়া নতুন ইভেন্টটি পুরুষদের ২০০মিটার ব্রেস্ট স্ট্রোক। এই ইভেন্টটি অবশ্য আগেই গেমসের জন্য রাখা হয়েছিল। দুই দিন আগে এসএওসি'র ৪০তম কার্যনির্বাহী সভার সিদ্ধান্তক্রমে বাদ পড়েছিল সাঁতারে পুরুষদের ২০০ মিটার ব্রেস্টস্ট্রোক ইভেন্টটি। এ ইভেন্টটি বাদ দেয়া আবার ফিরিয়ে আনা হচ্ছে কেন? এমন প্রশ্নে বাংলাদেশ অলিম্পিক এসোসিয়েশনের (বিওএ) এক কর্মকর্তা জানালেন, এ ইভেন্টে নাকি বাংলাদেশের স্বর্ণপদক পাওয়ার সম্ভাবনা খুব বেশী।

গত ১৮ নভেম্বর এসএওসি'র ৪০তম কার্যনির্বাহী সভায় পুরুষদের ২০০ মিটার ব্রেস্টস্ট্রোক বাদ দিয়ে সাঁতার ডিসিপ্লিনে যোগ করা হয়েছিল পুরুষদের ৪০০ মিটার ফ্রিস্টাইল ইভেন্ট। দুই দিন না যেতেই আবারো যোগ হলো বাদ পড়া ইভেন্টটি (পুরুষদের ২০০ মিটার ব্রেস্ট স্ট্রোক)। একটি সভার সিদ্ধান্ত হওয়ার দুই দিন না যেতেই কেন বাদ পড়া ইভেন্টটি আবারো যোগ করা হলো? এমন প্রশ্নের জবাবে বাংলাদেশ অলিম্পিক এসোসিয়েশনের (বিওএ) পরিচালক এবং সিইও কর্নেল (অব.) ওয়ালী উল্লাহ জানালেন, এ ইভেন্টে বাংলাদেশের স্বর্ণপদক পাওয়ার ভালো সম্ভাবনা আছে। এই ইভেন্টে রুবেল রানা বিগত আসরে রৌপ্য পেয়েছিল। সাঁতারে নতুন ইভেন্টটি যোগ হলেও কমছে না ৪০০ মিটার ফ্রিস্টাইল ইভেন্টটিও। ফলে আসন্ন এসএ গেমসে সাঁতার ডিসিপ্লিনে মোট ইভেন্ট এখন ২১টি। এর মধ্যে পুরুষদের ইভেন্ট ১২টি এবং মেয়েদের ৭টি। সাঁতারে ইভেন্ট বাড়লেও প্রতিযোগী কিন্তু বাড়ছে না। এসএওসি'র ৪০তম কার্যনির্বাহী সভায় সিদ্ধান্ত গৃহীত হয় সাঁতারে পুরুষদের দলে সর্বোচ্চ ১৯ জন এবং মেয়েদের দলে সর্বোচ্চ ১০ জন সাঁতারে অন্তর্ভুক্ত করা যাবে। শুধু সাঁতারের ইভেন্টটিই নয়, গত ১৮ নভেম্বর যোগ হওয়া মেয়েদের সাইক্লিং এ যুক্ত হওয়া ১৭০ কি মি রোড রেস ম্যাস স্টার্টে ইভেন্টে আনা হয়েছে পরিবর্তন। এ ইভেন্টে দূরত্ব কমিয়ে ৫০ কি মি রোড রেস ম্যাস স্টার্ট এ পুনর্নির্ধারণ করা হয়।

শোয়েব বাদ, ফিরছেন ইউনিস

ইন্টারনেট

ফিরব ফিরব করেও ফিরতে পারছেন না শোয়েব আখতার। একের পর এক ঝামেলায় জড়িয়ে জাতীয় দলে ফেরার সম্ভাবনা প্রায় নিঃশেষ করে ফেলেছেন পাকিস্তানের পেস দানব। বছর শেষের অস্ট্রেলিয়া সফরে জাতীয় দলের জার্সিটা আবারও গায়ে চাপানোর ইচ্ছা ছিল তার। কিন্তু শরীরের মেদ ও ওজন কমাতে চিকিৎসকের ছুরি-কাঁচির নিচে গিয়ে সেই সম্ভাবনারও ইতি টানলেন পিভি এক্সপ্রেস। পুরোপুরি সুস্থ হতে তার সময় লাগবে অন্তত পাঁচ মাস। পাকিস্তান ক্রিকেট বোর্ড (পিসিবি) চেয়ারম্যান ইজাজ বাট পরিষ্কার জানিয়ে দিয়েছেন,

অস্ট্রেলিয়া সফরে শোয়েবের জায়গা হচ্ছে না। বোর্ডের কাউকে কিছু না জানিয়ে অস্ট্রোপচার করানোয় শোয়েবের ওপর চটে আছেন বাট। তবে সুখবর হচ্ছে, ইউনিস খান ফিরছেন। অস্ট্রেলিয়া সফরেই ফেরার ইচ্ছাটা বোর্ডকে জানিয়েছেন পাকিস্তানের নেতৃত্ব থেকে সরে দাঁড়ানো এ মিডলঅর্ডার ব্যাটসম্যান।

আগামী গ্রীষ্মে অস্ট্রেলিয়ার বিপক্ষে পাকিস্তান তাদের 'হোম' সিরিজ খেলবে ইংল্যান্ডে। এ উপলক্ষে লর্ডসে আয়োজিত এক সংবাদ সম্মেলনে ফেরার ঘোষণা দেন ইউনিস। সিনিয়র ক্রিকেটারদের সঙ্গে অন্তঃকলহ ও দলের ওপর নিয়ন্ত্রণ হারানোর কারণে নিউজিল্যান্ড সফরের আগ মুহূর্তে নেতৃত্ব ছেড়ে দেন মারদানের ৩১ বছর বয়সী পাঠান। সেই সঙ্গে ক্রিকেট থেকে কিছুদিনের ছুটিও নেন তিনি। কিন্তু সেই বিশ্রাম বোধ হয় ভালো লাগছে না ইউনিসের। এ কারণে ডিসেম্বরের মাঝামাঝিতে অস্ট্রেলিয়ার সফরেই দলে ফেরার ইচ্ছাটা তিনি বোর্ডকে জানিয়েছেন। এজন্য ঘরোয়া ক্রিকেট খেলে নিজেকে প্রস্তুত করার কথাও ভাবছেন। অধিনায়ক হিসেবে ফিরবেন কিনা এমন প্রশ্ন উঠতেই ইউনিসের দার্শনিকসুলভ জবাব, 'সময় হলেই এ সিদ্ধান্ত নেয়া যাবে'। ঐ সংবাদ সম্মেলনে থাকা পিসিবি বস ইজাজ বাটও বললেন, দলে ইউনিসের অবস্থান কেমন হবে তা শিগগিরই মিডিয়াকে জানানো হবে।

একই সঙ্গে শোয়েবের ভবিষ্যৎ নিয়েও বোর্ডের অবস্থান তুলে ধরেন বাট, 'শোয়েবের বয়স ও ফিটনেস সমস্যার যে ইতিহাস তাতে তার ফেরাটা অনিশ্চিত।' ৩৪ বছর বয়সী পেসারের চেয়ে বর্তমান দলের তরুণদের প্রতিই আস্থা বেশি পিসিবি চেয়ারম্যানের। তাই শোয়েব কবে ফিরতে পারেন প্রশ্নটা উঠতেই সম্ভাবনাটা দূরে ঠেলে দিলেন বাট। বোর্ডের অনুমতি না নিয়ে মেদ ও ওজন কমানোর অস্ট্রোপচার করিয়েছেন পিডি এক্সপ্রেস। এর জন্য তাকে ডিসিপ্লিনারি কমিটির মুখোমুখি হতে হবে কিনা সে প্রশ্ন এড়িয়ে যান বাট। রিকি পন্টিংয়ের দলের বিপক্ষে পাকিস্তান আগামী মাসে বক্সিং ডে টেস্টে মুখোমুখি হবে। প্রশ্ন হচ্ছে, ইউনিস কি অধিনায়ক হিসেবেই ফিরবেন, নাকি খেলবেন ইউসুফের অধীনে।

আইরিশদের রিপ্লের আবেদন ফিফার না

ইন্টারনেট

রীতিমত 'ডাকাতি'। ফ্রান্সের কাছে প্যারিসের হারকে এরচেয়ে ভাল ব্যাখ্যা আর নেই যেন আইরিশদের কাছে। থিয়েরি অঁরি তাদের কাছে 'প্রতারক'। রেফারি 'মিথ্যাবাদী'। ম্যাচের সবঘটনাপ্রবাহ নিয়ে তারা যে চিত্রনাট্য তৈরি করেছে তাতে ফরাসিদের কাছে হারকে স্রেফ ডাকাতিই আয়ারল্যান্ডের কাছে। উইলিয়াম গালাসের অন্তিম মুহূর্তের যে গোলে ফ্রান্স বিশ্বকাপে তা যে এসেছে অঁরির হাতের ছোঁয়া বলের পাস থেকে। সেজন্যই ফিফা ও উয়েফার কাছে ম্যাচটি পুনরায় আয়োজনের দাবী জানিয়েছে আইরিশ সরকার এবং ফুটবল ফেডারেশন। যদিও তারা মানছে এটা অসম্ভব। 'আমি জানি ম্যাচ পুনর্মঞ্চায়ন করা অসম্ভব', আয়ারল্যান্ডের ইতালিয়ান কোচ ত্রাপোলিনি। তবে শুদ্ধতার কথা বলে দেশটির প্রধানমন্ত্রী ব্রায়ান কোয়েন ফিফাকে তাদের দাবীর প্রতি শ্রদ্ধা দেখানোর আহবান জানিয়েছেন, 'পরিশুদ্ধতা ফুটবলের একটা অংশ'। কোয়েন ব্রাসেলসে ইউ শীর্ষ নেতাদের বৈঠকে এ নিয়ে ফরাসি প্রেসিডেন্ট নিকোলাস সারকোজির সঙ্গে আলোচনাও করেন। তার সাথে সমব্যথী ফরাসি প্রেসিডেন্টও। অঁরির হ্যান্ডবল বিতর্কে না জড়িয়ে তিনি আইরিশদের কাছে এ ঘটনার জন্য ক্ষমা চান। তবে ফুটবলের সাথে রাজনীতিকে না জড়ানোর আহবানও জানান। 'আমি ব্রায়ান কোয়েনকে বলেছি তাদের দুগুণে আমি কতোটা সমব্যথী। কিন্তু রেফারির কিংবা ফ্রান্স ফুটবল অথরিটিজ কিংবা ইউরোপিয়ান ফুটবল কর্তৃপক্ষের বিকল্প হিসেবে আমাকে দাঁড় করাবেন না। আমি যেখানে আছি সেখানেই থাকতে দিন', ফ্রান্স প্রেসিডেন্ট সারকোজি। একই মত আইরিশ প্রধানমন্ত্রী কোয়েনে হলেও তিনি, 'ম্যাচটি পুনরায় অনুষ্ঠানে' পক্ষে আইরিশদের দাবীও সমর্থন করেন। তার দাবীর প্রতি সমর্থন আছে একজন ফরাসি মন্ত্রীরও। কিন্তু ফুটবলের সর্বোচ্চ সংস্থা ফিফার সিদ্ধান্ত 'না'। আইনের মারপ্যাচে তাদের করারও অবশ্য কিছু নেই। ফিফার আইনে পরিষ্কার বলা আছে, 'মাঠে রেফারির সিদ্ধান্তই চূড়ান্ত'। এটা বদলাবার কিংবা এ নিয়ে পুনরায় ম্যাচ আয়োজনের কোন নিয়ম নেই। আইরিশদের দাবী মানলে তাই বিভ্রান্তি ছড়াবে। 'ম্যাচ পুনর্মঞ্চায়নের কোন সুযোগ নেই। তা করা হলে ফুটবলে নৈরাজ্য দেখা দিবে। ফিফার আইন এ বিষয়ে

পরিষ্কার, বিবিসিতে দেয়া সাক্ষাৎকারে ফিফার এক মুখপাত্র। ফিফার ৫ নম্বর আইনের এ ধারার কারণেই আইরিশ কোচ ত্রাপোত্তিনি কোন আশা দেখছেন না আবেদনের পরও। তবে তিনি ভবিষ্যতে যেন এভাবে কাউকে না কাঁদতে হয় তা প্রতিকারের জন্য আহ্বান জানাচ্ছেন। যদিও অঁরি হাত দিয়ে বল ছোঁয়ার কথা নিজেই স্বীকার করে নিয়েছেন। মিডিয়া এমনকি প্রতিপক্ষ ফুটবলারদের কাছেও। এমন দাবীই করলেন আইরিশ লেফট ব্যাক কেভিন কিলবেন, ‘আমি তাকে মাঠে প্রশ্ন করলাম তুমি কি হ্যান্ডবল করেছ?’ উত্তরে সে বল, হ্যাঁ। তবে আমি তা করতে চাইনি। অথচ একই প্রশ্নের উত্তরে তাকে রেফারি মার্টিন হেনসন জবাব দিয়েছিলেন ‘আমি শতভাগ নিশ্চিত ওটা হ্যান্ডবল ছিল না।’ কিলবেনের দাবী রেফারি না দেখে মিথ্যার আশ্রয় নিচ্ছেন। কেন তার ব্যাখ্যাটা যেন আইরিশ বিচারমন্ত্রীর বক্তব্যে, ‘ফুটবলের ক্ষমতাধররা সম্ভবত ফ্রান্সকে তোলার পক্ষে।’ সেজন্যই তিনি মনে করেন তাদের দাবী ফিফা মেনে নিবে না, ‘আমরা ফুটবলে ছোট হওয়ায় তারা হয়তো এটা মেনে নিবে না।’ ম্যাচে বেশ প্রাধান্য দেখিয়েও এভাবে হারায় আইরিশ ফুটবলারদের চোখের পানিতে বুক ভাসছিল। তারা মনে করছে প্রতারণা ও ডাকাতি করেই তাদেরকে বিদায় করে দেয়া হলো, ‘অঁরির হ্যান্ডবল আমাদের স্বপ্নের বিরাট দাম দিতে হলো। আমরা ডাকাতির শিকার। প্রতারণা করা হয়েছে মনে করছি। কেননা আমরাই শ্রেয় দল ছিলাম’, আইরিশ ডিফেন্ডার সিন সেন্ট লেজার। তাদের সাথে অঁরির সমালোচনায় যোগ দিয়েছেন ফ্রান্সের বেশ কয়েকজন সাবেক তারকা। এদের মধ্যে ফ্রান্সের ১৯৯৮ সালের বিশ্বকাপ জয়ী দলের সদস্য পেটিট ও লিজারাজুও আছেন। আরেক লিজেন্ড ডেভিড জেনোলাও এটা মেনে নিতে পারছেন না, ‘এই মুহূর্তে ফরাসি হয়ে বেশ গর্ববোধ করছি না।’

যুক্তরাষ্ট্রের সেরা গে-রিচার্ডস

ইন্টারনেট : এ বছর জেসে ওয়েস পদকের জন্য মনোনীত হয়েছেন টাইসন গে ও সানিয়া রিচার্ডস। কিংবদন্তি অ্যাথলেট জেসে ওয়েসের নামে প্রতি বছর ট্র্যাক এন্ড ফিল্ডে যুক্তরাষ্ট্রের সেরা পুরুষ ও মহিলা অ্যাথলেটকে দেয়া হয় এ পদক। ২০০৯ সালের বর্ষসেরা নির্বাচিত হয়েছেন গে ও রিচার্ডস। জমকালো অনুষ্ঠানের মাধ্যমে তাদের হাতে পুরস্কার তুলে দেয়া হবে আগামী ৫ ডিসেম্বর। দু’জনই এ নিয়ে দ্বিতীয়বার ওয়েস পদক পাচ্ছেন। গে ২০০৭ ও রিচার্ডস ২০০৬তে প্রথমবার পেয়েছিলেন পদকটা। দু’জনকে দেশের সর্বকালের অন্যতম সেরা অ্যাথলেটের স্বীকৃতিও দিয়েছেন যুক্তরাষ্ট্র ট্র্যাক এন্ড ফিল্ডের প্রধান নির্বাহী ডগ লগান। গে এ বছর তিন মাসে ১০০ মিটারে তিনবার আমেরিকান রেকর্ড ভাঙেন। উসাইন বোল্টের সঙ্গে যৌথভাবে ইতিহাসের দ্বিতীয় সেরা টাইমিংও (৯.৬৯ সে.) গের দখলে। এছাড়া ২০০ মিটারে গড়েছেন ইতিহাসের পঞ্চম সেরা টাইমিং (১৯.৫৮ সে.)। অন্যদিকে রিচার্ডস মেয়েদের ৪০০ মিটারে বিশ্বশিরোপা জিতেছেন। বার্লিনে বিশ্ব অ্যাথলেটিক্স চ্যাম্পিয়নশিপে ৪স১০০ মিটার রিলেতে যুক্তরাষ্ট্রের শিরোপাজয়ী দলেরও অংশ তিনি। প্রতি বছর মার্কিন অ্যাথলেটিক্স সাংবাদিকদের ভোটে নির্বাচিত করা হয় সেরা অ্যাথলেটকে। এবার প্রথমবারের মত তাদের সঙ্গে ভক্তরাও দিয়েছেন ভোট।

টেস্টেও ফিরলেন বন্ড

ইন্টারনেট : আইসিএলের পাট চুকিয়ে আন্তর্জাতিক ক্রিকেটে ফিরেছেন গত সেপ্টেম্বরে। তবে সেটা নিউজিল্যান্ডের ওয়ানডে ও টোয়েন্টি টোয়েন্টি দলে। এবার টেস্ট দলেও ফিরলেন শেন বন্ড। পাকিস্তানের বিপক্ষে প্রথম দুই টেস্টের জন্য ঘোষিত দলে বন্ড ছাড়াও ফিরেছেন আরেক আইসিএল ফেরত পেসার ড্যারিল টাফি। ২০০১ সালে অভিষেক হলেও এ পর্যন্ত মাত্র ১৭ টেস্ট খেলেছেন বন্ড। কিন্তু এতেই ২২.৩৯ গড়ে ৭৯ উইকেট তার দখলে। ২০০৪ সালে সর্বশেষ টেস্ট খেলা টাফি তার ক্যারিয়ারের ৬৬ উইকেটের ২৪টিই নিয়েছেন পাকিস্তানের বিপক্ষে। দু’জনকে নেয়ার পেছনে প্রধান নির্বাচকের যুক্তি এটাই। অস্ট্রেলিয়ার বিপক্ষে গত বছর টেস্ট খেলা ব্যাটসম্যান গ্র্যান্ট এলিয়ট ও পিটার ফুলটনও ফিরেছেন দলে। কিন্তু জেসে রাইডারের ইনজুরি ও জ্যাকব ওরামের টেস্ট অবসরে শূন্যতাটা ঠিকই অনুভব করছেন কিউই নির্বাচকরা। পাকিস্তানের বিপক্ষে নিউজিল্যান্ডের প্রথম টেস্ট শুরু হবে মঙ্গলবার ডানেডিনে।

নিউজিল্যান্ড দল : ড্যানিয়েল ভেটরি (অধিনায়ক), শেন বন্ড, গ্র্যান্ট এলিয়ট, ড্যানিয়েল ফ্লিন, পিটার ফুলটন, মার্টিন গুপটিল, ক্রিস মার্টিন, ব্রেন্ডন ম্যাককুলাম, টিম ম্যাকিনটশ, ইয়ান ও'ব্রায়েন, জিতান প্যাটেল, রস টেইলর, ড্যারিল টাফি।

সেনাক্যাম্পে বেকহ্যাম

ফুটবল মাঠ ছেড়ে কিছুটা সময় সেনা ক্যাম্পে কাটাতে যাচ্ছেন লস অ্যাঞ্জেলেস গ্যালাক্সির ইংলিশ মিডফিল্ডার ডেভিড বেকহ্যাম। তবে কোন অপরাধের শাস্তি এটি নয়। জার্মানিতে আমেরিকান সেনাবাহিনীর ঘাঁটিতে আক্রান্ত সৈন্যদের চাঙ্গা করতেই বেকহ্যামের এ সফর। জার্মানির দক্ষিণ-পশ্চিমের কাইজারস্লটার্নের উদ্দেশ্যে সোমবার বিমানে উঠবেন বেকহ্যাম। সঙ্গে থাকবে তার গ্যালাক্সি সতীর্থরা। তারা সেখানে মার্কিন ঘাঁটি ও সৈন্যদের পরিবারের সঙ্গে দেখা করবেন। বিভিন্ন যুদ্ধে আহত যেসব মার্কিন সৈন্য ওখানকার আঞ্চলিক মেডিক্যাল সেন্টারে চিকিৎসাধীন রয়েছেন তাদের সঙ্গে দেখা করবেন বেকহ্যাম। স্থানীয় দল কাইজারস্লটার্ন এফসি'র বিপক্ষে বৃহস্পতিবার একটি প্রীতি ম্যাচেও অংশ নেবেন বেকহ্যাম।

আনামুল অমিতের জোড়া সেঞ্চুরি

জিম্বাবুয়ে অনূর্ধ্ব-১৯ হোয়াইট ওয়াশ

স্পোর্টস রিপোর্টার : ২ ম্যাচ হাতে রেখে সিরিজ জয়ের উৎসব করা বাংলাদেশ অনূর্ধ্ব-১৯ দল সফরকারী জিম্বাবুয়েকে হোয়াইট ওয়াশ করে ছেড়েছে। বগুড়া স্টেডিয়ামে অনুষ্ঠিত সিরিজের শেষ ম্যাচে (৫ম ম্যাচ) দুই ওপেনিং ব্যাটসম্যান আনামুল (১০৬), অমিত মজুমদার (১২৯) জোড়া সেঞ্চুরিতে সফরকারী জিম্বাবুয়ে অনূর্ধ্ব-১৯ দলকে ১২১ রানের বিশাল ব্যবধানে হারিয়ে ৫-০-তে সিরিজ জিতে নিয়েছে। টসে হেরে ব্যাট করতে নেমে এই দুই সেঞ্চুরিয়ানের ২৩১ রানের পার্টনারশিপে ভর করে বাংলাদেশ অনূর্ধ্ব-১৯ দল বিশাল পুঁজি পায় (২৭০/২)। আনামুল ১৪৬ বলে ৯টি চার এবং ১ ছক্কায় করেছেন ১০৬ রান, রানে ফেরা অমিত মজুমদারের ইনিংসটি ছিল অসাধারণ, ১৩৩ বলে ১৫ চার এবং ৩ ছক্কায় করেছেন তিনি ১২৯ রান। রান পাহাড়ে চাপা পড়া জিম্বাবুয়ে অনূর্ধ্ব-১৯ দল ১৪৯ রানে ইনিংস গুটিয়ে ফেলেছে স্পিনার সাব্বির রহমান রুশমানের দুর্দান্ত বোলিংয়ে (৪/১৩)।

বাংলাদেশ অনূর্ধ্ব-১৯ : ২৭০/২ (৫০ ওভারে), আনামুল ১০৬, অমিত মজুমদার ১২৯, সাব্বির রুশমান ১৫ (অপ.), মুজাফ্ফে ১/৪৬, মুগাভা ১/৪৩

জিম্বাবুয়ে অনূর্ধ্ব-১৯ : ১৪৯/১০ (৩৪.৪ ওভারে), চিরিমুত্তা ৪০, স্কট ২৫, সাকের ২/৩৬, সাব্বির রুশমান ৪/১৩, মাহামুদুল হাসান ১/৬

ফল : বাংলাদেশ অনূর্ধ্ব-১৯ দল ১২১ রানে জয়ী।

ম্যান অব দ্য ম্যাচ : অমিত মজুমদার।

আনিসের বিরুদ্ধে ব্যাড আস্পায়ারিংয়ের অভিযোগ

স্পোর্টস রিপোর্টার : এক সপ্তাহ আগে আস্পায়ার নাদির শাহর বিপক্ষে গাজী ট্যাংকের পক্ষপাতমূলক আস্পায়ারিংয়ের অভিযোগ এখনো বাসি হয়নি। ব্যাড আস্পায়ারিংয়ের কালো থাবা থেকে প্রিমিয়ার ডিভিশন ক্রিকেট লীগকে বাঁচাতে গাজী ট্যাংকের অভিযোগের প্রেক্ষিতে ভিডিও ক্যামেরায় ম্যাচ রেকর্ডিং শুরু করেছে সিসিডিএম গতকাল থেকে। তবে ভিডিও ক্যামেরা স্থাপনের পরও আস্পায়াররা পক্ষপাতিত্বের অভিযোগ থেকে

রেহাই পাচ্ছেন না। গতকাল ফতুল্লা স্টেডিয়ামে মোহামেডান-কলাবাগান ম্যাচে আম্পায়ার আনিসের বিপক্ষে পক্ষপাতিত্বের অভিযোগ তুলে সিসিডিএমকে প্রয়োজনীয় ব্যবস্থা গ্রহণের আবেদন জানিয়েছে কলাবাগান ক্রীড়া চক্র। কলাবাগানের ম্যাচে আনিসকে আম্পায়ারিং না দেয়ার মৌখিক আবেদনে কর্ণপাত করেনি সিসিডিএম, আহবায়ক নাজমুল কবির স্বাক্ষরিত লিখিত অভিযোগে সেটাই উল্লেখিত আছে। ব্যাট-প্যাড হওয়া সত্ত্বেও কলাবাগান অধিনায়ক জাভেদ ওমরকে ইচ্ছাকৃতভাবে এলবিডার্লিউতে ফিরিয়ে দেয়া হয়েছে, নাজমুস সাদতের কট বিহাইন্ডও প্রশ্নবোধক- এমন অভিযোগ কলাবাগান অফিসিয়াল রিয়াজ বাবুর। বল ডেলিভারির সময়ে পেস বোলার শাহাদাত রাজীব শব্দ করেন, এটি এখন পরিচিত। তবে প্রতিপক্ষ ব্যাটসম্যানদের আপত্তি না উঠলেও আম্পায়ার আনিস সতর্ক করেছেন- এটাকেও পক্ষপাতমূলক আম্পায়ারিং হিসেবে গণ্য করছেন তিনি। সিসিডিএম চেয়ারম্যান জিএস হাসান তামীম ভিডিও দেখে পক্ষপাতমূলক আম্পায়ারিং নিশ্চিত হতে চান, 'ভিডিও যখন করা হচ্ছে তখন কোন অভিযোগ উঠলে তা আদৌ কতোটা সত্য, তা নিরূপণ করা যাবে। আম্পায়ারদের মানও এতে যাচাই করা সম্ভব।'

সম্মিলিত ক্রীড়া পরিবারের দোয়া মাহফিল

স্পোর্টস রিপোর্টার : জাতির জনক বঙ্গবন্ধু শেখ মুজিবুর রহমানের ও তার পরিবারের নৃশংসতম হত্যাকাণ্ডের সাথে জড়িত ঘাতকদের ফাঁসির রায় চূড়ান্তভাবে সর্বোচ্চ আদালত সুপ্রিম কোর্টে অনুমোদন হওয়ায় সম্মিলিত ক্রীড়া পরিবার সৃষ্টিকর্তার নিকট শোকরিয়া আদায় করেছে। আজ বিকেল চারটায় জাতীয় ক্রীড়া পরিষদের সভাকক্ষে ক্রীড়া পরিবারের পক্ষ থেকে দোয়া মাহফিলের আয়োজন করা হয়েছে।

মিডিয়া কাপে চ্যাম্পিয়ন পূর্বকোণ

স্পোর্টস রিপোর্টার : বাংলাদেশ স্পোর্টস জার্নালিস্ট এসোসিয়েশন (বিএসজেএ) চট্টগ্রাম শাখা আয়োজিত কিশোয়ান মিডিয়া কাপ ফুটবল টুর্নামেন্টের চ্যাম্পিয়ন হচ্ছে স্থানীয় দৈনিক পূর্বকোণ। গতকাল এমএ আজিজ স্টেডিয়ামে টুর্নামেন্টের ফাইনাল ম্যাচে তারা ১-০ গোলে হারিয়েছে দৈনিক কালেরকণ্ঠকে। বিজয়ী দলের পক্ষে ২৫ মিনিটে জয়সূচক গোলটি করেছেন এমরান। প্রতিযোগিতায় পূর্বকোণের দেবাশিষ বড়ুয়া টুর্নামেন্ট সেরা হয়েছেন।

বৃষ্টিতে ভেসে গেছে প্রথম ম্যাচ

ইন্টারনেট : সফররত ইংল্যান্ড ও দঃ আফ্রিকার প্রথম ওয়ানডে ম্যাচটি গতকাল বৃষ্টিতে পরিত্যক্ত হয়েছে। জোহানেসবার্গের ওয়াডারার্সে মুষলধারে বৃষ্টির কারণে কাল প্রথম ওয়ানডেতে একটি বলও মাঠে গড়ায়নি। আগামীকাল সেঞ্চুরিয়নে সিরিজের দ্বিতীয় ম্যাচে মুখোমুখি হবে দু'দল।

কঠিন পরিস্থিতির মুখে ব্রাদার্স

স্পোর্টস রিপোর্টার : প্রিমিয়ার ডিভিশন ক্রিকেট লীগ থেকে ব্রাদার্স ইউনিয়নের প্রথম বিভাগে অবনমন হয়েছে ২ বছর আগে। এক সময়ে ঢাকার ক্লাব ক্রিকেটের অন্যতম শক্তি ব্রাদার্স ইউনিয়নের প্রথম বিভাগ ক্রিকেট লীগ মোটেও সুখকর হচ্ছে না। গত মৌসুমে কোনমতে রেলিগেশন এড়িয়েছে দলটি, এবার প্রথম বিভাগে টিকে থাকাই দুরূহ হয়ে পড়েছে গোপীবাগের দলটির। গতকাল ঢাকা বিশ্ববিদ্যালয় মাঠে অগ্রণী ব্যাংকের কাছে ২৩ রানে (অগ্রণী ব্যাংক ২৩৮/৯, ব্রাদার্স ২১৫/১০) হেরে কঠিন পরিস্থিতির মুখে এখন ব্রাদার্স ইউনিয়ন। ৭ম ম্যাচে এটি তাদের ৫ম হার, অন্যদিকে ব্রাদার্সকে হারিয়ে প্রথম বিভাগে টিকে থাকা নিশ্চিত করেছে অগ্রণী

ব্যাংক (৪র্থ জয়)। ধানমন্ডি ক্রিকেট স্টেডিয়ামে অনুষ্ঠিত দিনের অন্য খেলায় ইয়াং পেগাসাসকে ১৬ রানে হারিয়ে (ইস্কাটন ২৪০/৬, পেগাসাস ২২৪/১০) ৮ম ম্যাচে ৫ম জয় তুলে নিয়েছে ইস্কাটন সবুজ সংঘ, সমসংখ্যক খেলায় পেগাসাসের ৫ম হার। সিটি ক্লাব মাঠে ওয়াডারার্সকে ৫০ রানে হারিয়েছে গোপীবাগ ফ্রেডস (গোপীবাগ ২৭২/৯, ওয়াডারার্স ২২২/১০) ৭ ম্যাচে গোপীবাগের এটি ৩য় জয়, অন্যদিকে ওয়াডারার্সের ৫ম হার। জাহাঙ্গীরনগর বিশ্ববিদ্যালয় মাঠে অনুষ্ঠিত ম্যাচে বারিধারা ডেজলার্স ৪ উইকেটে (কাঠালবাগান ১৯০/৬, বারিধারা ১৯৩/৬) হারিয়েছে কাঠালবাগানকে। ৮ম ম্যাচে বারিধারার এটি ৩য় জয়, অন্যদিকে কাঠালবাগানের ৫ম হার।

বায়ুফে একাদশের সাথেও প্রস্তুতি ম্যাচ খেলবে জাতীয় ফুটবল দল

স্পোর্টস রিপোর্টার : আগামী ৪ ডিসেম্বর থেকে ১৩ ডিসেম্বর ঢাকায় অনুষ্ঠিতব্য বঙ্গবন্ধু সাফ ফুটবল চ্যাম্পিয়নশিপের আগে একটি প্রস্তুতি ম্যাচ খেলার সুযোগ পাচ্ছে বাংলাদেশ জাতীয় ফুটবল দল। জানা গেছে, আগামী ২৩ নভেম্বর তারা প্রস্তুতি ম্যাচ খেলবে বায়ুফে একাদশের বিপক্ষে। ম্যাচটি অনুষ্ঠিত হবে বিকেল ৩টাতে। অবশ্য এই ম্যাচ ছাড়া আরো দুটি প্রস্তুতি ম্যাচের সিদ্ধান্ত আগেই ছিল জাতীয় ফুটবল দলের। আগামীকাল তারা প্রথম প্রস্তুতি ম্যাচে মুখোমুখি হবে পেশাদার ফুটবল লীগের দল শেখ রাসেলের বিপক্ষে ম্যাচটি বঙ্গবন্ধু জাতীয় স্টেডিয়ামে বিকেল ৫টায় শুরু হবে। পরের দিন জাতীয় দল বায়ুফে একাদশের বিপক্ষে এবং ২৬ নভেম্বর তারা সাফের শেষ প্রস্তুতি ম্যাচে মুখোমুখি হবে দক্ষিণ কোরিয়ার দল উলসান হুন্দাইয়ের বিপক্ষে। জাতীয় ফুটবল দলই নয় বিশ্ব জলবায়ু পরিবর্তন ইস্যু উপলক্ষে কোপেনহেগেন একাদশের বিপক্ষে এক প্রদর্শনী ম্যাচের জন্য গড়া হচ্ছে ২৬ সদস্যের বায়ুফে একাদশ। দলে ফুটবলার ১৯ জন। বায়ুফে একাদশে মনোনীত ফুটবলারদের আজ বিকেল ৩টায় দলনেতা হাসানুজ্জামান খান বাবলুর নিকট রিপোর্ট করতে বলা হয়েছে। বায়ুফে একাদশে মনোনীতরা হলেন- শাকিল, জিয়া, সুজন, শুভ্র, নজরুল, আব্দুল্লাহ পারভেজ, ওবায়দুর, জয়, শরিফ, মতিউর মুন্না, ফয়সাল, শাকিল, পাশু, আলফাজ, তপু, রনি, আবুল, নাসির, মোবারক ও মুন্না।



